



25. januar 2011

UPA2011/46

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalackersuisut peqquneqarnissaannik Inatsisartut aalajangiiffigisassaattut siunnersuut, kingusinnerpaamik FM12-mi peqquneqassasut, pilersaarusiortarneq aamma nunaminertamik atuisarneq pillugu Inatsisartut inatsisaata nr. 17-ip 17. november 2010-meersup allangortinneqarnissaanut Naalackersuisut siunnersuusioqqullugit, taamaasilluni inatsisitigut tunngavissaqalersinniarlugu inuk inuilluunniit nunaminertamik tunineqarnissaminut qinnuteqartut pilersaarummik piariikkamik ilanngussisalissasut kiisalu nammineq akiliisinaanermut uppernarsaammik. Tamatuma saniatigut nunaminertamik tunisiner-mut atatillugu piumasaqaatigineqartalissaaq, qinnuteqartup pisussaaffigisalissagaa, sanaassatut qinnutigisami, akuerineqarnermiit ukiut marluk qaanngiutsinnagit sananissaanut.

(Inatsisartuni ilaasortaq Justus Hansen, Demokraatit)

Tunngavilersuut:

Piffissap ingerlanerani nunaminertanik illuliorfissanik tunniussisoqartarpoq. Tamanna nuannaarutaasariaqarpoq, kisianni Nuummi piffissap ingerlanerani tamanna eqquiniaanertut iluseqalersimavoq, illuutit atorlugit iluanaarniapiluttartut sulissutigisarmassuk illut akisuupilussuanngornissaat, inunnik naliginnarnit unammisassaajunnaarlugit. Tassa imaappoq, inuit naliginnaat nammineq illuliornissaminut periarfissat annertuumik magiarneqartarput.

Tamanna tunngavigalugu Demokraanini isumaqarpugut, pilersaarusiortarneq nunaminertanillu atuisarneq pillugu Inatsisartut Inatsisaat nr. 17 17. november 2010-meersoq nutartertariaqartoq naleqqussarneqarlunilu. Ullumikkut kikkugaluartulluunniit nunaminertamik qinnuteqarsinnaaput. Aamma taamaappoq illumi napparneqartussami nammineq najugaqassanngikkaluaraanniluunniit.



Demokraatini isumaqarpugut tamanna kukkunerusoq. Inatsit iluseqartariaqarpoq, nunaminertamik tunineqarnissaminnut qinnuteqartoq qinnuteqartulluunniit pilersaarummik piariikkamik ilanngussisalersillugit kiisalu nammineq akiliinissamut uppersaammik. Taamatut periuseqarnikut Demokraatini isumarput naapertorlugu qulakkeerneqassaaq siunertaqapiluttut piiarneqartalernissaat aamma ugguartarunnaassaagut takussaassagatsigu nunaminertat tunniunneqartut ukiorpassuarni attorneqartannginnerat.

Isumaga naapertorlugu ajornartorsiutaavoq kommuunit oqartussaaffiini inuinnarnut sanaartorfitsanik tunniussisarnerup annikippallaarnera, kisiannili amerlanerusunik tunniussisoqartanngikkallartillugu, taava inatsit allannqortittariaqarpoq illuutininik iluanaarniapiluttartut akorngusersorniarlugit, iluanaarniapiluttarnerullu pilerinartuuneranik millisaanikkut. Tamatuma saniatigut soorunami inatsit iluseqartariaqarpoq, suliffiutilli namminersortut qaqugumulluunniit qinnuteqarsinnaatillugit sanaartorsinnaatillugillu, unammilleqatigiinneq aqputigalugu nammineq illuutillit tuniniaasinnaatillugit akit naliginnaasut atorlugit.

Siunnersuutikkut isumaga naapertorlugu qulakkeerneqassaaq, inuit toqqavissamik qinnuteqartut illuliaminni najugaqartarnissaat imaluunniit illuliortartut unammilleqatigiinneq naliginnaasooq atorlugu nioqutissaminnik illuliorsinnaalissapput pisortat akileeqaataatinnikkaluarlugit.

Pisortanut aningaasaqarnikkut allaffissorinikkullu kingunerisassai

Nalilerneqarpoq siunnersuut pisortanut aningaasatigut kinguneqarumaartoq, inatsisip allanguutaa suliarineqartussammat, nutserneqartussaammat il.il. kingornalu tusarniutigineqarluni. Inatsisissatut siunnersuutip suliarinera taamaasilluni allaffissornermi nukinnik atuisussaavoq. Isumaqartoqarporli 2011-mi aningaasanut inatsit aqputigalugu suliamut taamaattumut aningaasaliisoqareernikuusoq, kontu pingaarneq 70.00.01 Ineqarnermut, Attaveqarnermut, Angallanermullu Pisortaqarfimmi allaffissornermut 2011-mi atugassat 600.000 koruuninik ilaneqarnikuummata, ineqarnermut inatsisip naleqqussarnissaannut atugassanik. Una siunnersuut sulianut taakununnga ilanngunneqarsinnaavoq.

Inuussutissarsiornermut aningaasaqarnikkut allaffissorinikkullu kingunerisassai



Siunnersuut namminersorlutik inuutissarsiortunut imatut kinguneqassagatinneqanngilaq siunnersuutip kingunerisussaammaga, iluanaarniapilussinnaanerup killilerneqarnera, tamannalu illunik nioqutissanik sanaartortussanut tunuarsimaartitsisariaqanngilaq. Illussanik sanaartortartup ataatsip siunnersuutip aningaasatigut kingunissai artussappagit, taava qinnuteqartoq taanna qinnuteqartutut uppernartutut isigineqarsinnaanngilaq.

Innuttaasunut aningaasaqarnikkut allaffissornikkullu kingunerisassai

Siunnersuut innuttaasunut aningaasatigut kinguneqassaaq, siunnersuutip kingunerisussaammagu, innuttaasut nunaminertamik tunineqarusuttut tunngaviusumik akissaqartariaqarmat illuliornini naammassiniarlugu. Innuttaasut tunngaviusumik qularnaaveeqquisiinnaanngippata imaluunniit akiitsorsinnaanngippata taava qularnartupilussuuvoq aamma illuliaminnik naammassinnissinnaanissaat. Siunnersuutikkut taamaallaat akiorneqarniarpoq iluanaarniapiluttoqarsinnaanera taavalu nunaminertat tunniunneqartut sanaartorfigineqartassasut. Siunnersuummi nunaminertamik tunineqarnissaq qulakkeerniarlugu aningaasanut tunngasut eqqartorneqartut taamaallaat siunertaraat ilumoorunnagu qinnuteqarsinnaasut pinaveersimatinnissaat aamma iluanaarniapiluttunut tunniussisoqartannginnissaa.

Taamatut oqaaseqarluta Naalakkersuisut akissutissaat qilanaarlunga utaqqissavara kiisalu partii-nit allanit oqaaserineqartussat aamma qilanaarlunga utaqqillugit.